

Amarabiro yo mu gatabu k'ikoraniro ry'Ubuzima bwacu n'igikorwa cacu

1-7 MUNYONYO

UBUTUNZI BWO MW'IJAMBO RY'IMANA | YOSUWA 18-19

**“Yehova yakoresheje ubukere-
butsi mu kugabura amatongo”**

it-1 933 ing. 5

Akarimbi

Mu kugaburira imiryango ca gihugu, biboneka rero ko hisunzwe ibintu bibiri: ivyava mu bupfindo hamwe n'ukuntu umuryango waba ungana. Ubupfindo bwarashobora kwerekana gu-sa ahaherereye itongo buri muryango watorana. Bwaravuga ko uzogerera muri iki gice canke ikindi c'ico gihugu, nk'akarorero mu buraruko canke mu bumanuko, mu buseruko canke mu burengero, mu kiyaya gihereranye n'ikiyaga canke mu misozi. Kubera ko ikivuye mu bupfindo caba kivuye kuri Yehova, vyaratuma hataba ishari canke ugutongana mu miryango. (Img 16:33) Biciye ku bupfindo kandi, Imana yarayobora ibintu kugira ivy'umuryango umwumwe wose bihuze n'ivyo sekuruza w'i-miryango Yakobo yasize avuze

ahumekewe igihe yari ku mpfiro biri mw'Itanguriro 49:1-33.

it-1 1107 ing. 6

Intoranwa

Amatongo batoranye. Yehova ni we yahaye Abisirayeli intoranwa kuko ari we yabwiye Musa imbi-be z'igihugu botoranye. (Gh 34:1-12; Yos 1:4) Musa ni we yahaye bene Gadi, bene Rubeni n'igice c'umuryango wa Manase imigabane yabo. (Gh 32:33; Yos 14:3) Iyindi miryango yaronse intoranwa biciye ku bupfindo, bikaba vyari biagarikiwe na Yosuwa hamwe na Eleyazari. (Yos 14:1, 2) Mu buryo buhuye n'ivyo Yakobo yari yaravuze mw'Itanguriro 49:5, 7, Simeyoni na Lewi ntibaronse imigabane bigabira bwan-toranwa. Intoranwa ya Simeyoni yari igizwe n'akarere (hamwe n'ibisagara bitagira imihora) kari mu ntoranwa ya Yuda (Yos 19:1-9), Lewi na we atorana ibisagara 48 vyari hirya no hino mu gihugu cose Isirayeli yatoranye. Kubera ko Abalewi baronse igikorwa kidasanzwe kw'itaberenakulo, Yehova yavuze ko yari we ntoranwa yabo. Kubera rero ico

gikorwa barangura, baca baronka ic'icumi nka wo muturi canke intoranwa yabo. (Gh 18:20, 21; 35:6, 7) Buri rugo rwaronka intoranwa mu karere k'umuryango bakomokamwo. Uko rero ingo zongerekana abana bakaronka intoranwa, igihugu cagenda kirushiriza kugaburwa mu matongo matomato.

it-1 933 ing. 6

Akarimbi

Igihe ubupfindo bwaba bumaze kwerekana aho umuryango kanaka uherereye, vyaba bikenewe rero ko bamanya ubunini bwa ho hisunzwe ca kintu ca kabiri, na co akaba ari ukuntu umuryango waba ungana. Dusoma duti: "Muze mwigabanganirize ico gihugu biciye ku bupfindo nk'uko imiryango yanyu iri. Ku muryango munini, muze mwongereze intoranwa yawo, kuri muto na wo muze mugabanye intoranwa yawo. Iyo ubupfindo buzosohoka bwerekana ku bwawo, ni ho hazoba ahawo." (Gh 33:54) Ubupfindo bumaze kuvuga aho umuryango kanaka uherereye vyaguma ukwo nyene, ariko barashobora kugira ivyo bahinduye ku kuntu intoranwa ingana. Ku bw'ivyo, igi-

he basanga umugabane wa bene Yuda ari munini cane, itongo ryabo ryaragabaniwe, igice kivuyeko gica gihabwa umuryango wa Simeyoni.—Yos 19:9.

Ducukure ubutunzi bwo muri Bibiliya

it-1 934 ing. 1

Akarimbi

Inkuru y'ingene akarere ko mu burengero bwa Yorodani kagabuwe ivuga ko ubupfindo bwabanje kwerekana akarere ka Yuda (Yos 15:1-63), aka Yozefu (Efurayimu) (Yos 16:1-10), n'ak'igice c'umuryango wa Manase co mu burengero bwa Yorodani. (Yos 17:1-13) Iyo nkuru irerekana imbibe z'utwo turere hamwe n'ibisagara iyo miryango yaronse. Inyuma y'ivyo, bigaragara ko igikorwa co kugabangana ico gihugu caciye kiba kirahagaze, kubera ko biboneka yuko ikambi ya Isirayeli yariko irimuka iva i Gilugali ija i Shilo. (Yos 14:6; 18:1) Naho ikiringo ivyo vyamaze kitavugwa, amaherezo Yosuwa yarahambariye imiryango indwi yari isigaye kubera yatevye kwigarurira igice c'igihugu cari gisigaye. (Yos 18:2, 3) Abasobanuzi b'ivya Bibiliya baravuze imvo nyinshi

zoba zaratumye iyo miryango indwi iteba kwigarurira ico gihu-gu. Hari abavuze ko isahu ryinshi bari bararonse igihe bariko bararwana no kuba Abanyakanani batasubkiye kubatera vyoba ari vyo vyatumye iyo miryango indwi ibona ko ivyo kwigarurira igice c'igihugu cari gisigaye bitihuta. Kuba baratinya guhangana n'a-bansi bakomeye bishobora kuba biri mu vyatumye bateba kwigarurira ako karere. (Yos 13: 1-7) Vyongeye, ico gice c'Igihu-gu c'isezerano ntibari bakizi neza ugereranije n'ukuntu bari bazi ibindi bice vyari bimaze kugabanganwa.

8-14 MUNYONYO

UBUTUNZI BWO MW'IJAMBO RY'IMANA | YOSUWA 20-22

“Ivyigwa dukura ku nkuru y'a-batahuranye ukutari kwo”

w06 15/4 5 ing. 3

Ibantu nyamukuru vyobafasha guseruranira akari ku mutima n'uwo mwubakanye

Guseruranira akari ku mutima ata guhishanya biratuma hataba ukudatahurana be no gufata ibantu uko bitari. Ihanga rya Isi-

rayeli rimaze igihe gito ribayeho, umuryango wa Reyubeni, uwa Gadi be n'umuryango w'igice wa Manase, iyaba mu Buseruko bw'Uruzi Yorodani, yarubatse 'igicaniro kinini cibonekeza' ku nkengera ya Yorodani. Iyindi miryango yatahuye ukutari kwo ivyo bakoze. Kubera ko abo muri iyo miryango yo mu Burengero bwa Yorodani biyumviriye ko benewabo bo hakurya ya Yorodani bari bakoze ikintu c'ubuhuni, baciyе bitegurira kuja gutera abo benewabo bafashe ko ari nk'abararaji. Arikо imbere y'uko baja kubatera, bararungitse intumwa kugira zije kuyaga n'iyo miryango yo mu Buseruko. Mbega ikintu kiranga ubukerebutsi bakoze! Basanze ico gicaniro kitari ico kwoserezako amashikanwa atemewe canke ibimazi bitemewe. Ahubwo, iyo miryango yo mu Buseruko yatinya yuko iyo yindi miryango yohava ibabwira iti: “Nta mugabane mufise k'Uhoro-ho”. Ico gicaniro cobaye icabona c'uko na bo nyene bari abasavyi ba Yehova (Yosuwa 22:10-29). Ico gicaniro bacise Icabona, kumbure kubera yuko cobaye icabona c'uko kuri bo Yehova yari yo Mana y'ukuri.—Yosuwa 22:34.

w08 15/11 18 ing. 5

“Dukurikirane ibuntu biremesha amahoro”

Abisirayeli bamwebamwe bashobora kuba babona ko ibimenyamenya bihagije vy'uko hari hakozwe icaha vyari bimaze kuboneka, kandi ko baramutse babubiriye bakabatera vyotumye ku ruhande rwabo hasiga ubuzima bake cane. Ariko abari bagize imiryango yo mu Burengero bwa Yorodani, aho guca bihutira kubatera, bararungitse intumwa kugira ngo ziganire n'abo bavukanyi babo kuri iyo ngorane. Bababajije bat: “Uku kuntu mwahemukiye Imana y'Abisirayeli mwagutewe n'iki, ko mwaciyeye mureka gukurikira Uhoraho?” Ku bwa ngingo, iyo miryango yari yubatse nya gicaniro ntiyari yahemutse. Ariko none bovyifashemwo gute ku bijanye n'ivyo bagirizwa? Boba baciye baterana amajambo n'abo babagiriza canke baranka kuganira na bo? Iyo miryango yagirizwa icaha yishuranye ubwitonzi, ivuga itomoye yuko ivyo bakoze mu vy'ukuri bari babitumwe n'icipfuzo bari bafise co gukorera Yehova. Inyishu batanze yarazigamye ubucuti

bari bafitaniye n'Imana yongera ituma atawuhasiga ubuzima. Kuganira batekanye vyaratoreye umuti nya ngorane vyongera biragarukana amahoro.—Yos. 22: 13-34.

Ducukure ubutunzi bwo muri Bibiliya

it-1 390 ing. 4

Kanani

Naho Abanyakanani benshi batahitanywe n'ibitero bikomeye vy'Abisirayeli canke ngo batsindwe, twovuga ko “Yehova [yahaye] Isirayeli igihugu cose yari yararahiye ko azoha ba sekuruza babo,” ko yabahaye “akaruhuko impande zose” be n'uko ata “muhango n'umwe utashitse mu mihang myiza yose Yehova yari yarahaye inzu ya Isirayeli; yose yararangutse.” (Yos 21:43-45) Abansi bari bakikuje Isirayeli bari bafise ubwoba ku buryo batahungabaniye koko umutekano wa Isirayeli. Imana yari yaravuze ko yokwirukanye Abanyakanani “buhorobuhoro” kugira ngo ibikoko vy'ibinyesha-mba ntibice bigwirirana mu gihugu gicitse igiharabuga bukwi na bukwi. (Kv 23:29, 30; Gus 7:

22) Naho Abanyakanani bari bafise ibirwanisho bikomakomeye, ushizemwo n'imikogote y'intambara ifise ibikeruzo vy'icuma, kuba Abisirayeli batashoboye kwigarurira uburere bumwebumwe ntibisigura ko ari Yehova yananiwe gushitsa ivyo yaseranye. (Yos 17:16-18; Abc 4:13) Ahubwo riho, Bibiliya yerekana ko incuro nke Abisirayeli batsinzwe vyavuye ku guhemuka kwabo.—Gh 14:44, 45; Yos 7:1-12.

15-21 MUNYONYO

UBUTUNZI BWO MW'IJAMBO RY'IMANA | YOSUWA 23-24

**“Impanuro za nyuma Yosuwa
yahaye Abisirayeli”**

it-1 82

Isezerano

Ibantu vyari vyifashe uguandukanye n'ukwo igihe ihanga rya Isirayeli ryinjira mu Gihugu c'i-sezerano i Kanani. Umukama Segaba yari yeguriye Abisirayeli ico gihugu nk'uko yari yarabisezeraniye ba sekuruza babo. Kubw'ivyo, ntibinjiye muri ico gihu-gu ari nk'abanyamahanga, kandi Yehova yarababujije kugiranira

isezerano n'amahanga y'abapagani yari muri ico gihugu. (Kv 23:31-33; 34:11-16) Babwirizwa kugamburuka gusa amategeko y'lmana n'ingingo ngenderwako zayo, atari amategeko y'amahanga yagira yirukanwe. (Lw 18:3, 4; 20:22-24) Bari baragabishijwe canecane ku bijanye no kugiranira amasezerano yo kwabirana n'ayo mahanga. Mwene ayo masezerano yotumye barongora abagore b'abapagani, bakagira incuti z'abapagani, bagakora n'imigirwa n'imigenzo yabo ifitaniye isano n'idini ry'ikinyoma. Ivyo vyotumye baba abahuni, bikabata no mu mutego.—Gus 7:2-4; Kv 34:16; Yos 23:12, 13.

w07 1/11 26 ing. 19-20

Ijambo rya Yehova ryama riranguka

¹⁹ Nta nkeka yuko twisunze ivyo twiboneye n'amaso yacu, dushobora kuvuga duti: “[N]ta kintuna kimwe mu vyiza vyose Uhoro-ho Imana yanyu yabasezeraniye kitāshitse; vyose vyarasohoye, nta kintu na kimwe muri vyo kitāshitse” (Yosuwa 23:14). Yehova ararokora abasavyi biwe, akabakingira, akongera akabaronsa ivyo bakeneye. Hoba hari

umuhango n'umwe Yehova yatanze woshobora kuvuga yuko utarangutse mu gihe cawo kibereye? Emwe, nta n'uwa kirazira woronka! Ni ibiranga ubukerebutsi ko twemera ivyo Ijambo ry'lmana ryo kwizigirwa rivuga.

²⁰ Tuvuge iki ku bijanye na kazoza? Yehova yaratumenyesheje ko abenshi muri twebwe bafise icizigiro co kuzoba kw'isi izoba yahindutse Iparadizo iteye igomwe. Bakeya muri twebwe bafise icizigiro co kuzofatanya na Kristu kuganza bari mw'ijuru. Twaba dufise icizigiro ikihe, turafise imvo zumvikana zo kuguma turi intahemuka nka kumwe kwa Yosuwa. Hazogera igihe icizigiro cacu kiranguke. Ico gihe tuzotereza amaso inyuma twihweze imihango yose Yehova yatanze, maze natwe tuvuge duti: "Vyose vyarasohoye".

Ducukure ubutunzi bwo muri Bibiliya

w04 1/12 12 ing. 1

Ibikurubikuru vyo mu gitabu ca Yosuwa

24:2—Se wa Aburahamu, ari we Tera, yoba yasenga ibigirwamana? Mu ntango, Tera ntiyari

umusavyi wa Yehova Imana. Ashobora kuba yarasenga imana-kwezi yitwa Sini, kikaba cari ikimana casengwa cane i Uri. Twisunze inkuru mpererekano z'Abayuda, Tera ashobora mbere kuba yari umuhinguzi w'i-bigirwamana. Arikorero, igihe Aburahamu yava i Uri abitegetswé n'lmana, Tera yarajanye na we i Harani.—Itanguriro 11:31.

22-28 MUNYONYO

UBUTUNZI BWO MW'IJAMBO RY'IMANA | ABACAMANZA 1-3

"Inkuru yerekana umutima rugabo n'amayeri"

w04 15/3 31 ing. 4

Ehudi ahagarika agacinyizo k'u-wabacura bufuni na buhoro

Imigambi ya Ehudi ntayarangutse bivuye ku bwenge bwiwe canke ku vy'uko umwansi ata buhanga yari afise. Imigambi y'lmana ntiranguka bivuye ku bantu. Ikitu nyamukuru catumye Ehudi yererwa ni uko Imana yamufa-she mu mugongo igihe yakora ibintu yisunze igomba ryayo ritananirwa ryo kubohoza abasavyi bayo. Imana yari yahagurukije Ehudi, "kand'uk'Uhoraho ya[ha

abasavyi biwe] umucamanza, yaba kumwe n'uwo mucamanza".
—Abacamanza 2:18; 3:15.

w04 15/3 30 ing. 1-3

Ehudi ahagarika agacinyizo k'u-wabacura bufuni na buhoro

Ikintu ca mbere Ehudi yategerezwa gukora kwari 'ukwicurishiriza intambi' ifise ubugi impande zompi kandi ikaba ngufi ku buryo yashobora kuyinyegeza mu kuyambarirako. Ashobora kuba yitegako bomusatse. Mu bisanzwe inkota bazambara ibubamfu, aho abakoresha ukuryo vyaborohera kuzisokorora. Kubera ko Ehudi yari ibamfu, yambaye ikirwanisho ciwe "kw itakory'i buryo, a[k]irenzakw impuzu ziwe", kuri iryo tako akaba ari ahantu kumbure abarinzi b'umwami batosatse. Ku bw'ivyo, ata wumutangiriye "aragenda, ashikanira E guloni umwami w'i Mowabu iryo shikanwa".
—Abacamanza 3:16, 17.

Ntituzi ido n'ido ry'ingene ibintu vyagenze Ehudi agishika ku kirimba kwa E guloni. Bibiliya yivugira gusa iti: "Ehudi ahejeje kwākīrirwa iryo shikanwa, arungika abantu baje baryikoreye" (Abacamanza 3:18). Ehudi yara-

shikanye iryo shikanwa hanyuma aca aherekeza abaje baryikoreye kuva ku kirimba kwa E guloni gushika aho badashobora kugira ico baba, maze amaze kubarungika aca asubira ku kirimba. Kubera iki? Yoba yazananye n'abo bantu kugira bamukingire, kugira babe gusa ingendanyi ziwe canke kugira babe gusa abikorezi b'iryo shikanwa? Ikindi na co, imbere y'uko ashira mu ngiro umugambi wiwe, yoba yashatse ko bava aho hantu kugira ntibahave bahagirira isanganya? Ehudi yaba yari afise mu muzirikanyi iki canke kiriya, yaragarutse ari wenyene abigiranye umutima rugabo.

"[Ehudi] ashitse i Pesilimu hafi y'i Gilugali, arakimirana; arashika abgira umwami, ati Bgirukiro, mfise ijambo ry'ibanga nsaba kukubgira". Ivyanditswe ntibisigura ingene yabigenjeje kugira ngo yemererwe gusubira kurennguka imbere ya E guloni. Mbegnone, abarinzi ntibari bakwiye kugira amakenga? Boba biyumvi-riye yuko U mwisirayeli umwe ata ngorane yoteza umukama wabo? Kuba Ehudi yagarutse ari wenyene vyoba vyatanze iciyumviro

c'uko yahemukiye benewabo? Uko biri kwose, Ehudi yara-savye kubonana n'umwami mu mwiherero kandi vyarakunze.—Abacamanza 3:19.

Ducukure ubutunzi bwo muri Bibiliya

w05 15/1 24 ing. 7

Ibikurubikuru vyo mu gitabu c'A-bacamanza

2:10-12. Dutegerezwa kugira urutonde rwo kwiyigisha Bibiliya ubudahorereza kugira ngo 'ntitwibagire ivyo Yehova yakoze' (Zaburi 103:2). Abavyeyi barakeneye kwinjiza ukuri kw'ljambo ry'lmana mu mitima y'abana babo.—Gusubira mu vyagezwe 6:6-9.

29 MUNYONYO-5 KIGARAMA

**UBUTUNZI BWO MW'IJAMBO
RY'IMANA | ABACAMANZA 4-5**

"Yehova akoresha abagore babiri mu kurokora abasavyi biwe"

w15 1/8 12 ing. 6

'Nahagurutse nka inabibondo muri Isirayeli'

Izina Sisera ubwaryo ryarajugumiza Abisirayeli. Idini ry'Aba nyakanani n'imico yabo vyara-

ngwamwo ubukozi bw'ikibi: Abana baricwa bagatangwa nk'ibimazi hagakorwa n'ubumaramaya ku rusengero. Gutwarwa n'umujenerali w'Umunyakanani n'ingabo ziwe wibaza ko vyari bimeze gute? Muri rwa ruririmbo Debora yaririmvye, avuga ko abantu batafata ingendo muri ico gihugu be n'uko batari bakiba mu mazu yabo. (Abacamanza 5:6, 7) Twoshobora kwiha ishusho abantu banyegye mu bisaka no mu misozi, badashobora kurima canke kuba mu bisagara vyabo bidakingiwe. Baratinya kandi guca mu mabarabara kuko bohava baterwa, abana babo bagatwarwa, abagore babo na bo bagafatwa ku nguvu.

w15 1/8 13 ing. 1

'Nahagurutse nka inabibondo muri Isirayeli'

Abisirayeli b'intabarirwa bamaze imyaka 20 bahahazwa gushika Yehova abonye ko bashobora guhinduka. Nk'uko ururirimbo Debora na Baraki baririmvye babitumwe n'lmana ruvyerekana, vyagumye gutyo 'gushika Debora ahagurutse, gushika ahagurutse nka inabibondo muri

Isirayeli.’ Ntituzi ko Debora, umugore wa Lapidoti, yoba yari afise abana vy’ukuri, ariko iyo mvugo yakoreshewe mu buryo bw’ikigereranyo. Ni nk’aho Yehova yari yashinze Debora igikorwa co gukingira abantu biwe nka kurya inabibondo abigira. Yamusavye guhamagara umugabo yari afise ukwizera gukomeye ari we Mucamanza Baraki, kugira amubwire ko yoja kurwanya Sisera.—Abacamanza 4:3, 6, 7; 5:7.

w15 1/8 15 ing. 2

‘Nahagurutse nka inabibondo muri Isirayeli’

Yayeli yategerezwa gufata ingingo adatebaganye. Yareretse Sisera ahantu yoruhukira. Sisera yamusavye ko hagize uwuza kumurondera yomubwira ko atari ho ari. Amaze kuryama yarampfutse. Igihe yasaba amazi yaciyeamuha amata. Sisera ntityevye gutwarwa n’itiro ryinshi. Yayeli yaciye atora urumambo n’inyundo, ivyo bikaba ari ibikoresho abagore baba mu mahema bari bamenyereye cane gukoresha. Amaze gupfukama hafi y’umutwe wa Sisera yaciye akora igikorwa giteye uwomba co

gushitsa urubanza rwa Yehova. Iyoasuha na gatoyi kari kuba kamubanye. Muri uwo mwanya yoba yariko ariyumvira abasavyi b’Imana n’ingene uwo mugabo yari amaze imyaka mirongo abahaza? Canke yoba yagumye abona mu bwenge agateka yari afise ko gushigikira Yehova? Iyo nkuru nta vyo ivuga. Ico tuzi co ni uko atavyirijemwo. Sisera aho wamubonye!—Abacamanza 4:18-21; 5:24-27.

Ducukure ubutunzi bwo muri Bibiliya

w05 15/1 25 ing. 5

Ibikurubikuru vyo mu gitabu c’Abacamanza

5:20—Ni mu buryo ubuhe inyenyeri zo kw’ijuru zatabaye Baraki? Bibiliya ntivuga nimba ukwo kwari ugufashwa n’abamarayika, ugukoragurika kw’ibivunji biva ku yindi mibumbe vyabonwa ko ari agasema n’abantu b’abanyabwenge ba Sisera, canke kumbure yuko vyari ivyo Sisera yari yabwiwe n’abaragurishanyenyeri mugabo bikaba bitashitse. Ariko rero, nta gukeka ko Imana yahaserutse mu buryo bumwe canke ubundi.

6-12 KIGARAMA

UBUTUNZI BWO MW'IJAMBO RY'IMANA | ABACAMANZA 6-7

“Jana izo nkomezi ufise”

w02 1/3 6-7

**Ingingo ngenderwako z’Imana
zirashobora kukugirira aka-
maro**

Umuntu atifata ukwo atari kandi atiha agaciro karengeye, ni Gideyoni, umucamanza wo mu Baheburayo ba kera. Ntiyarondeye kuba indongozi ya Isirayeli. Ariko rero, igihe yagenwa ngo arangure iryo banga, Gideyoni yashize imbere ivy’uko ataco yari ashoboye. Yasiguye ati: “Inzu yacu [ni] iyo hasi mu muryango wa Manase, nanje nkaba nd’ umuherrerezi kwa data.”—Abacamanza 6:12-16.

w05 15/7 16 ing. 3

**‘Inkota ni iya Yehova na Gideyo-
ni!’**

Ese ukuntu Abamidiyani batekerwa n’ubwoba! Bukwi na bukwi muri ako gacerere, baza bumva urwamo ruvuye ku kumenagurika kw’imibindi 300, amajwi y’inzamba 300, n’akaru k’abantu 300. Kubera yuko Abamidiyani babuze ico bafa-

ta n’ico bareka, na canecane bitumwe na ka karuru kavuga ngo ‘Inkota ni iya Yehova na Gideyoni!’, baca bongera induru ku yindi. Muri uwo muvurungano, ntibashobora gutandukanya umwansi n’umukunzi. Abo bantu 300 baguma bihagarariye aho bashizwe, mu gihe Imana iriko iratuma abansi babo bazibagura bakoresheje inkota zabo. Ikambi iraneshwa, abasigaye nta ho bari buhungire, ibikorwa vyo guherengeteza umwansi bigizwe no kumwoma inyuma, bituma Abamidiyani batongera kugera-mira Abisirayeli. Agacinyizo kari kamaze igihe kirekire kagiye karangira.—Abacamanza 7:19-25; 8:10-12, 28.

**Ducukure ubutunzi bwo muri
Bibiliya**

w05 15/1 26 ing. 6

**Ibikurubikuru vyo mu gitabu c’A-
bacamanza**

6:25-27. Gideyoni yarakoresheje ukwiyubara kugira ngo ntaratse abamurwanya bidakenewe. Igihe twamamaza inkuru nziza, dute-gerezwa kwiyubara kugira ngo imvugo yacu ntibababaze abandi bidakenewe.

13-19 KIGARAMA

UBUTUNZI BWO MW'IJAMBO RY'IMANA | ABACAMANZA 8-9

"Aho kwibona twokwicisha bu-gufi"

w00 15/8 25 ing. 3

Utorera umuti gute amatati?

Gideyoni yararwanye cane n'Abamidiyani, aratumako n'umuryango wa Efurayimu ngo umufashe. Ariko iyo ntambara imaze kurangira, abagabo ba Efurayimu baciye bahindukirira Gideyoni, baramushwanira cane ngo ntiyabahamagaye intambara igitangura. Iyo nkuru ivuga ko 'bamutonganije bimwe bikaze.' Gideyoni yabishuye ati: "None nakoze iki ugereranije namwe? Iyo Efurayimu yatoroye ntibiruta inzabibu zasārūwe na Abi-ezeri? Mu kuboko kwanyu ni ho Imana yatanze abaganwa ba Midyani, ari bo Oreb na Zeyebu; ni igiki none nakoze ugereranije namwe?" (Abacamanza 8:1-3) Ayo majambo meza Gideyoni yavuze atekanye yaratumye hataduka intambara hagati y'iyo miryango ibiri. Abo mu muryango wa Efurayimu bashobora kuba bari bafise ingorane yo kwishima no kwibona ko ari agakomeye. Ariko ivyo

ntivyabujije Gideyoni kurondera kugarukana amahoro. Ni akarore-ro keza twokwigana.

w17.01 20 ing. 15

Igituma kwifata ruto bigihambaye

¹⁵ Gideyoni ni akarorero ntangere ku bijanye n'ukwifata ruto. Igihe umumarayika wa Yehova yatangura kumubonekera, Gideyoni yariyemereye ko yava mu muryango uciye bugufi be n'uko yari we muto mu nzu ya se. (Abac. 6:15) Mugabo Gideyoni yarizigiyе Yehova maze aremera igikorwa yari amushinze. Yaciye arondera kumenya neza nimba yaratahura ivyo yasabwa gukora, yongera ari-tura Yehova ngo amuyobore. (Abac. 6:36-40) Gideyoni yari umuntu w'umutima rugabo. Ariko rero, yariyubara kandi agakora-na ubukerebutsi. (Abac. 6:11, 27) Ntiyafatiye ku gikorwa yari yashinzwe kugira arondere kuba rurangiranwa. Ahubwo nyabuna, amaze kurangura igikorwa Yehova yari yamushinze, yaciye yisubirira iwe.—Abac. 8:22, 23, 29.

w08 15/2 9 ing. 9

Nugendere mu nzira za Yehova

⁹ *Kugira ngo tube abakunzi b'l-mana, dutegerezwa "[k]wicisha*

bugufi mu muzirikanyi" (1 Pet. 3:8; Zab. 138:6). Mu Bacama-nza ikigabane ca 9 harerekana ko kwicisha bugufi bihambaye. Gideyoni umuhungu wa Yota-mu yavuze ati: "Kera ibiti vyari bigiye kwiyimikamw'umwa-mi wo kubiganza". Muri ivyo biti haravugwamwo ic'umwelayo, ic'u-musukoni be n'umuzabibu, ivyo na vyo bikaba vyagereranya aba-ntu b'abizigirwa batarondeye kuganza Abisirayeli bagenzi babo. Ariko umubambangwe, uwusa-nzwe ukoreshwa gusa mu guvana umuriro, wagereranya ingoma y'umunyabwibone Abimeleki, uno akaba yari umwicanyi yari ashashaye gukandamiza abandi. Naho 'yamaze imyaka itatu ari we aga-nza Abisirayeli', urupfu rwahavuye rumukubiranya (Abac. 9:8-15, 22, 50-54). Ese ukuntu ari vyiza cane 'kwicisha bugufi mu muzirikanyi'!

Ducukure ubutunzi bwo muri Bibiliya

it-1 784 ing. 5

Efodi, I

Naho Gideyoni yari afise intu-mbero nziza yo kwigina intsinzi Yehova yari yahaye Isirayeli no gutera iteka Imana, iyo efodi yahavuye "ibera umutego Gi-

deyoni n'urugo rwiwe," kubera ko Abisirayeli baciye batangu-ra kuyisenga. (Abc 8:27) Ariko, Bibiliya ntivuga ko Gide-yoni ubwiwe yayisenze; ahubwo nyabuna, intumwa Paulo yaramu-vuze adomako muri ca 'gipfungu kinini c'ivyabona' bakorera Yehova badahemuka imbere y'u-bukirisu.—Heb 11:32; 12:1.

20-26 KIGARAMA

UBUTUNZI BWO MW'IJAMBO RY'IMANA | ABACAMANZA 10-12

"Yefuta yashira imbere Ye-hova"

w16.04 7 ing. 9

Kuba abizigirwa bituma dushi-mwa n'Imana

⁹ Uburorero bw'abantu b'abi-zigirwa nka Yozefu, uwagiriye imbabazi bene wabo naho 'bamwanka,' na bwo nyene bu-shobora kuba bwaratumye Yefuta avyifatamwo neza. (Ita. 37:4; 45: 4, 5) Kuzirikana kuri bene ubwo burorero vyoshobora kuba vyara-fashije Yefuta guhitamwo gukora ibihimbara Yehova. Nta gukeka ko inyifato y'abo bavukana ya-mubabaje cane, ariko ntiyaretse

gukorera Yehova n'abasavyi bi-we. (Abac. 11:9) Yefuta yabona ko kurwana aburanira izina rya Yehova vyari bihambye kuruta ingorane ziwe bwite. Yari yiemeje kuguma ari umwizigirwa kuri Yehova, bikaba vyatumye we n'abandi bahungukira.—Heb. 11: 32, 33.

it-2 1202 ing. 6

Yefuta

Uwo mugabo w'umunyabikorwa Yefuta ntiatevye kwerekana ko ari umutware w'umunyenkomezi. Yararungikiye ubutumwa umwami wa Amoni, aramubwira ko Amoni ari yo igomba kwandurutsa intambara mu kwinjira mu karere ka Isirayeli. Umwami yamwishuye ko Isirayeli ari yo yari yarigaruriye ico gihugu ca Amoni. (Abc 11:12, 13) Yefuta yarerekanye ko atari umurwanyi w'inkazi atazi ibintu, ariko ko yari azi amakuru ya kahise, canecane ivyo Imana yakoranye n'abasavyi bayo. Yaramiriye kure ivyo bintu umwami wa Amoni avuze, arerekana (1) ko Isirayeli itigeze itera Amoni, Mowabu canke Edomu (Abc 11:14-18; Gus 2:9, 19, 37; 2Ng 20:10, 11); (2) ko ako karere umwami wa Amoni yarondera

katari rwiwe igihe Isirayeli yakigarurira, kubera ko katwarwa n'Abanyakanani b'Abamori kandi Imana akaba ari yo yatanze umwami wabo Sihoni n'ighugu ciwe mu kuboko kwa Isirayeli; (3) ko Amoni itarondeye kwigurrira ako karere ka Isirayeli mu myaka 300 yari iheze. None muri ico gihe ni ho hari hageze ko bakarondera?—Abc 11:19-27.

it-2 1202 ing. 7

Yefuta

Yefuta yashitse ku muzi w'ingorane mu kwerekana ko ico kibazo gifitaniye isano n'ivyo gusenga. Yaravuze ko Yehova Imana ari we yari yarahaye Isirayeli ico gihugu, ko rero ata n'akantu ide bohaye abasenga imana z'ikinyoma. Yavuze ko Kemoshi ari imana ya Amoni. Hari abiyumvirije ko ukwo kwabaye ukwhenda. Yamara, naho imana ya Amoni yari Milikomu, Kemoshi na yo ikaba imana ya Mowabu, ayo mahanga yompi yasenga imana nyinshi nariry ari afitaniye ubucuti. Mbere Salomo yarazanye ivyo gusenga Kemoshi muri Isirayeli kubera abagore bi-we b'abanyamahangakazi. (Abc 11:24; 1Bm 11:1, 7, 8, 33; 2Bm

23:13) Vyongeye, incabwenge zimwezimwe zivuga ko “Kemoshi” bishobora kuba bisobanura “Uwutsinda, Uwunesha.” (Raba igitabu *Gesenius's Hebrew and Chaldee Lexicon*, cahinduwe na S. Tregelles, 1901, rup. 401.) Yefuta ashobora kuba yavuze iyo mana kubera ko Abamoni bavuga ko ari yo yatumye ‘batsinda’ canke ‘banesha’ ayandi mahnaga, ikabaha n’igihugu cayo.

Ducukure ubutunzi bwo muri Bibiliya

it-2 1201

Yefuta

Yefuta ntイヤリ umwana w’ikivyarwa. Nyina wa Yefuta yari “umugore w’umumaraya,” ariko ivyo ntibisobanura ko Yefuta yavutse mu bumaraya canke ko yari ikivyarwa. Nyina wiwe *yari yarigeze* kuba umumaraya imbere y’uko aba umugore agira kabiri wa Gileyadi, nka kurya nyene Rahabu yari yarigeze kuba umumaraya ariko mu nyuma akubakana na Salumoni. (Abc 11:1; Yos 2:1; Mt 1:5) Kuba Yefuta atari ikivyarwa bigaragarira mu kuba bene wabo bavuka ku mugore wa mbere wa Gileyadi baramwirukanye ngo ntaronke

intoranwa. (Abc 11:2) Vyongeye, Yefuta yahavuye aba umutware yemewe w’abagabo ba Gileyadi (bikaba bishoboka ko bene wabo na Yefuta ari bo baza ubwa mberere muri bo). (Abc 11:11) N’ikindi kandi, yarashikaniye Imana ikimazi kw’itaberenakulo. (Abc 11:30, 31) Umwana w’ikivyarwa ntイヤリ gushobora gukora ikintu na kimwe muri ivyo, kuko Itegeko ryavuga mu buryo butomoye riti: “Nta mwana w’ikivyarwa ashobora kwinjira mw’ishengero rya Yehova. Mbere no gushika kw’iyaruka rigira icumi, mu biwe nta n’umwe ashobora kwinjira mw’ishengero rya Yehova.”—Gus 23:2.

27 KIGARAMA-2 NZERO

UBUTUNZI BWO MW’IJAMBO RY’IMANA | ABACAMANZA 13-14

**“Ico abavyeyi bokwigira kuri
Manowa n’umugore wiwe”**

w13 15/8 16 ing. 1

**Bavyeyi, nimwigishe abana
banyu guhera mu buhinja**

Rimbura ibijanye na wa mugabo wo mu muryango wa Dani yitwa Manowa, yaba mu gisagara ca Zora muri Isirayeli ya

kera. Umumarayika wa Yehova yamenyesheje umugore wa Manowa yari ingumba yuko yovyaye umwana w'umuhungu. (Abac. 13: 2, 3) Nta gukeka ko uwo mugabo w'umwizigirwa Manowa n'umuke-nyezi wiwe banerezerejwe cane n'ico kintu. Ariko rero, hariho kandi ibintu bikomeye vyari bibaraje ishinga. Ni co gituma Manowa yasenze ati: "Ntunga Yehova. Wa muntu w'lmana y'ukuri uhejeje gutuma, ndakwinginze agaruke aho turi, atwigishe ingene tu-zogenza uwo mwana azovuka." (Abac. 13:8) Manowa n'umuke-nyezi wiwe bari barajwe ishinga n'ukuntu boreze uwo mwana. Nta gukeka ko bigishije umuhungu wabo Samusoni itegeko ry'lma-na kandi biboneka ko utwigoro twabo tutabaye impfagusa. Bibili-ya ivuga iti: "Impwemu ya Yehova itangura [gucanira Samusoni]." Ivyo vyatumye Samusoni akora ibikorwa vy'ububasha vyinshi ari umwe mu bacamanza ba Isirayeli. —Abac. 13:25; 14:5, 6; 15:14, 15.

w05 15/3 25 ing. 5

Samusoni atahukana intsinzi ku bw'inkomezi za Yehova!

Igihe Samusoni yariko arakura, "Uhoraho [yabandanije ku]muha umugisha" (Abacamanza 13:24).

Umusi uri izina Samusoni yaraje kwa se na nyina, maze ababwira ati: "Nabonye umwigeme i Timuna w'Umufilisitiyakazi: none ni mu-munsabire" (Abacamanza 14:2). Iyuvire ingene batangaye. Ha kugira ngo umwana wabo akure Abisirayeli mu maboko y'ababa-hahaha, yashaka gusaba umugen'i muri bo. Kwabira umugore wo mu basenga imana z'abapagani vyari biteye kubiri n'Ivyagezwe vy'lmana (Kuvayo 34:11-16). Ni co catumye abo bavyeyi bamwankira bat: "Mbega nta mwigeme n'u-mwe ari mu b'i wanyu canke mu b'iki gihugu, igitumye uja gusaba umugen'i mu Ba filisitiya batāke-bge?". Ariko rero, ico nticabujije ko Samusoni avuga ashimitse ati: "Nsabira uyo, kukw ari we nago-mwe".—Abacamanza 14:3.

Ducukure ubutunzi bwo muri Bibiliya

w05 15/3 26 ing. 1

Samusoni atahukana intsinzi ku bw'inkomezi za Yehova!

Ni mu buryo ki uwo Mufilisiti-yakazi 'yari ate ye igomwe' canke ari we yari abereye kuri Samusoni? Igitabu kimwe c'inkoranyabumenyi ca McClintock na Strong kivuga yuko atari

kubera ko yari “mwiza, w’akaranga, asa n’irirenga, ahubwo yari abereye ku bijanye no gushikira ihangiro rinaka, umugambi munaka, canke intumbero yinaka”. None hari ku bijanye n’irihe hangiro? Mu Bacamanza 14:4 hasigura yuko Samusoni “yarondera inyanduruko ku Bafilisitiya”. Samusoni yagomwe uwo mwigeme ku bw’uwo mugambi. Uko Samusoni yagenda arakura, ‘impwemu y’Uhoraho yaciye itangura ku-

mucanira’, canke kumukaburira kugira ico akoze (Abacamanza 13:25). Impwemu ya Yehova rero ni yo yatumye Samusoni asaba umugore uko bitari bisanzwe bigirwa iwabo, ikaba ari na yo yatumye arangura igikorwa ciwe cose co kuba umucamanza wa Isirayeli. Samusoni yoba yarorange ico yariko ararondera? Reka tubanze turabe ingene Yehova yamukuye amazinda ko amufashe mu mugongo.